



Aqqalu C.Jerimiassen
Atassut

UPA 2023/11 - 1
23. maj 2023

2022-mut Nunatta Karsiata naatsorsuutaasa akuerineqarnissaannik siunnersuut

(Aningaasaqarnermut Naligiissitaanermullu Naalakkersuisoq)

Nunatta karsiata naatsorsuutai eqqartortuartaagut, naak atoriikkat allanngortissinnaanngisatsitut ilereeraluartut. Taamatuttaarlu ukiut tamarluinnaasa aningaasat taakku, annertussutsit taakku, annikittuinnarmik allannguuteqarsimasut.

Aningaasammi eqqartortuartaakkagut qiviariaraanni, 2020-imiik 2022-imut aningaasaliissutaasartut eqqarsaatingalugit, allanngoriaatit hurraartuutissavissuurtut inissisimannngitsut, annikitsuinnarmilli nikeriaateqartarsimasut.

Takussutissaq siulleq tassa uaniinginnarpoq, nunatta aningaasarsiornerata ineriartornera annerusumik minnerusumilluunniit piunngilaq.

Aningaasarsiornikkut ineriartoqqissinnaanermut pikkorlunneq ajoraluartumik tassani erseqqarilluinnarpoq. Ukiummi tamarluinnaasa, qinersisoqarnerisalumi tamarluinnaasa orpiit qorsooqqiit silaqqillu neriorsuutigineqartuurtarput.

Taamaakkaluartorli, alloriaataasinnaasut anginerusut eqqartorneqalerpata nipaannersuaq piulersarpoq.

Utoqqalinersiat, piitsuussuseq, inissiat aserfallattut, nioqqutissat akitsoriartortut, aningaasap pisissutaasinnaanera apparaluttuinnarnera ilaalu ilanngullugit ila sorpassuit aaqqiivigisariaqartarneri eqqartorneqartuurtarput, ilami tusarnersaarutigilluarneqartaqaallumi aaqqittariaqarnerinik.

Paasisinnaassangaluarparput, aaqqittariaqarnerinik oqalussagaanni akissaanittaaq tikkuussisartoqartuuppat.

Tusarnersaartuarnerillumi Atassummiit atungarinngisatoqarigatsigit, akissaqarfigineqanngitsullu toqqaannarsuaq kusassarnagit isertuanata taaneqartarnerisa kingunerinik tusarnersaartuurtuniit partiip angissusaata tamanna uppernarsaannarunnarsivaa.

Tusarnersaartuarneq akissaqarfiginngisanik sunniiniutitsialaasimavoq ukiorpanni.

Aalisarneq ingerlalluarpoq, taannaannaavorli maanna “ajoraluartumik” aningaasaqarnitta nappatigisaa sukarsualu pingaarnerpaaq. Aatsitassanut sinnattuusimasoq, uuliamut sinnattuusimasoq tamarmik ipisinneqareerput.



Neriutigiinnassuarpullu mittarfiit naammassereeripata takornariaqarneq aamma ipisittoorneqassanngitsortaaq pikkorliortuernerup kinguneranit.

Ukiuni amerlavallaani aningaasap avataaniit pilersissinnaanissaanik eqqarsartaaseqarnissaq pinnagu, innuttaasulli kaasarfiiniit aalaaginnartarnera pikkoriffigineqarsimaqaaq. Taannalu nunatta karsianut nikingasoorutaaratarsinnaasunut narlorsaatitut atortuarsimavaat.

Taamaaliortuernerlu ataavartuusinnaanngilaq, ilanngarteriuarluta naggataani qaatuaqilissagatta innuttaasut akiliisinnaassusaat innarlerlugu.

Aningaasarsionnikkut nappatituarput ullut arlaanni ajutoorataassangaluarpat, tassalu aalisarneq naatsorsuutiginnngisamik ajutumeeratassangaluarpat nunatta aningaasaqarnera ullormiit ullormut tassanngaannaq ajalussusaavoq, maanna ingerlariusaasoq atorineqartuarniarpat.

Inuussutissarsionermullu politikkeqarneq ersernerlussisarneqartuuartilluguttaaq ajornakusoorpoq takorluussallugu, piffissami qaninnermi allanngortoqarumaarneranit.

Tusarneraallaqqissuuneq inuiaqatigiinnut sunniiniutitut atorineqarniartuuartillugu akissaqassuserput qaffariaateqangaarunnangilaq.

Kukkunersiuinermut ataatsimiitsitaliaq sulilluarnissaanik kissaallugu, Atassummiit nunatta karsiata naatsorsuutaanut 2022-imoortumut nassuiaammut naalakkersuisunut qujavugut.